

REGIONAL NEWS BULLETIN

HEADLINES (EVENING)

Date – 20/05/2024

Time - 18:30 -18:40Hrs

1. MPSC) Chairman thar Pu R.Lalramnghakachu vawiin khan Raj Bhawan Durbar Hall-ah Governor Dr Hari Babu Kambhampati an rinawmna thu tiam tirin a lalut.
2. Ministry of Skill Development (MSDE) hnuaiah NSDC leh Skill India tangkawpin National Skill Competition - Indiaskills:2024 New Delhi-a a buatsaihah Mizoramin Medal 8 a la.
3. Tukin dar 7 atang khan Lok Sabha inthlan thawhngana atan vote thlak a ni.
4. Iran President Ebrahim Raisi leh Foreign Minister Hossein Amir-Abdollahian te chu helicopter chesualah an thi.



MPSC CHAIRMAN SWORN IN

Mizoram Public Service Commission (MPSC) Chairman thar Pu R.Lalramnghakachu vawiin khan Raj Bhawan Durbar Hall-ah Governor Dr Hari Babu Kambhampati an rinawmna thu tiam tirin a lalut.

MPSC Chairman lakluh Inkhawmah hian Chief Minister Pu Lalduhoma, Speaker Pu Lalbiakzama, Home Minister Pu K.Sapdanga, Cabinet Minister te, Minister te, MLA te leh mi pawimawh dangte an tel a, Pu Zoramthanga, Chief Minister hlui pawh a tel a ni.

Pu R.Lalramnghaka hi thiamna lamah B.Sc (Agri) degree a nei a. Kum 1991 khan Mizoram Civil Service a zawm a, chumi hnuah kum 2009 khan Indian Administrative Service (IAS), AGMUT Cadre-ah hlankai a ni leh bawk a ni.

Pu R. Lalramnghaka hian Mizoram sorkar hnuaiah mawhphurhna pawimawh tak tak a chelh tawh thin a. MPSC Chairman atana ruat a nih hma chiah hian Secretary, General Administration Department &Public Works Department a ni a.

Pu.R.Lalramnghaka hi Sept ni 9 1965 ah a piang a. A nupui Pi Vanlalliani leh a fate nen Aizawl Electric vengah an cheng mek a ni.



SUPPLY DEPT

Food Civil Supplies & Consumer Affairs Minister Pu B.Lalchhanzovan vawiin khan a pisaah FCI Executive Director (North East) Pu DP Shukla leh a thawhpuite kawmin FCI lam hian Mizorama an hnathawh mek dan leh an mamawh tul te Minister hnenah hian an thlen.

An mamawh an thlen zingah hian Sairang Dintar Veng-a kudam (Buhfai quintal nuaih khat leng) an sak mek chungchanga Forest clearance avanga an buaina chuan kudam sak hna a tih thuanawp dan te an sawi a. Minister chuan LR&S hotuten he thil hi an buaipui sak mek thu leh Compensatory Afforestation atan ram an hmuh fel sak tawh thu a lo hrilh. Minister chuan Forest department lam hotute chu FCI ten kudam sak an chhonzawm theih nan an thlawpna a phut thu sawiin, buh leh bal a kan rin ber an nih avangin ngaihpawimawh a tul zia a sawi baw. EF&CC pawn theihtawp an chhuahpui tur thu a sawi. Pu B.Lalchhanzova chuan Khawzawl a FCI kudam (Quintal 33400 leng) sakna hmun a lei nghet taw. lo nia sawi chu endik thuai a, a rang lama hma la turin FCI houtute a chah.

Pu Sandeep Deora chuan Dintar veng, Sairang leh Khawzawl a kudam te sak zawh an nih chuan Mizoram ah FCI in vawikhata thla riat ei khawp chhek khawlina hmun anei thei dawn tih sawiin, hei hian fur pui leh khuarel chhiatna dang vanga rail leh kawngpuiharsatna te thlen mahse Mizoram chuan buhfai ah security a neih dawn thu a sawi baw. Pu B. Lalchhanzova chuan FCI hotute chu a tul anga kudam Mizoram hmun laili deuhah sak bellh dan tur ngaihtuah tura a tul thu sawiin, FCI hotutte chuan anlo bawhzui tur thu an hrilh ani.



MSDE

Ministry of Skill Development (MSDE) hnuaiah NSDC leh Skill India tangkawpin National Skill Competition - Indiaskills:2024 New Delhi-a a buatsaihah Mizoram Medal 8 a la a ni.

Labour, Employment, Skill Development and Entrepreneurship Department hmalaknain Mizoram chuan Indiaskills Competition : 2024 a tel turin trade 16 ah mi 16 a tir a, Intihsiakna hi May 16-19 chhunga neih niin May 20 a Closing Ceremony hman niin Mizoram hetiang hian lawmman a dawng a ni.

1. Maximus Lalruatkima chuan Gold (Floristry) ah a dawng a,
2. Vanlalbiakdikin - Gold (Shoe Making) ah a dawng a
3. Emily VL Thakimi - Gold (Fashion Technology) ah a dawng a
4. Anthony Lalchhanhima - Silver (Drone Film Making)ah a dawng a
5. Laltlanzovi - Medallion of Excellence (MoE), (Hair Dressing)ah a dawng a
6. Vanlalhriatchhungi - Medallion of Excellence (MoE), (Beauty Therapy)ah a dawng a
7. Liansangrem - Medallion of Excellence (MoE), (Plumbing & Heating)ah a dawng a

8. Lallawmkima - Medallion of Excellence (MoE), (Electrical Installation)ah a dawng a

Indiaskills 2024, National Competition-ah hian Competitor 1000 chuang State hrang hrang atanga State Winners theuhte kalkhawmin trade 61 hnuaiah intihsiakna an nei a, Mizo thalaite pawh skill trade 16 hnuaiah an tel thei a ni. He intihsiakna Gold leh Silver dawngte hian Worldskills : 2024, Lyon, France-a kumin September thla a neih turah India aiawhin intihsiakna an hmachhawn leh dawn a ni.

Mizoram Team-te hi LESDE Department Director, Pi Angela Zothanpuii hovin Official mi paruk ten an hruai a. Mizoram hi Indiaskills competition-ah a tum 2 telna niin kum 2022 khan Medal 2 Gold leh Bronze lo la tawhin, kumin hian Medal 8 an la leh thei a ni.

Mizoram Team te hi vawiin khan Mizoram lo thlengin, Lawmna Inkhawm tawi Airport chawlbuk hmunah Department-in an lo buatsaih a, Officials leh participants Nu leh Pa ten he hun tawi hi an hmang ho thei a ni.

Labour, Employment, Skill Development & Entrepreneurship minister Pu Lalnghinglova Hmar chuan, India Skills Competition 2024 neih zawh taka Mizoram tana medal late chu an chhuanawm a tih thu a sawi.

LESDE Minster chuan vawiin khan social media kaltlanga lawmpuina thu sawiin, India Skills Competition 2024-ah Mizoramin medal 4 leh Medallion of Excellence 4 lai a la thei chu lawmawm a tiin medal late a lawmpui a, a buaipuitu department pawh an chhuanawm, a ti.



PIGFED PRESS CONF

Mizoram Pig Farmer's Association chuan vawiin khan Aizawl Press club ah thuthar lakhawmtute kawmin , Mizorama Frozen vawksa rawn lut chu dan phalloh ani a. A dan kawngah Mizoram Pig Farmer's Association chuan theihtawp a chhuah dawn tih an sawi.

Mizoram Pig Farmer's Association General Secretary Zorinpua Chuan Mizoram ah 2021 April 16 ah ASF confirmed a ni a. Mizoram pum a run a, hemi avang hian Mizoram Pig Farmer's Association pawh ni 11 August 2021 ah a lo piang thu sawiin . Kum 2021 leh 2022 ah kum zawn in ASF hri in Mizoram pum min run a ,hemi avang hian Vawk, vawk sa tanga eitur siam chhuah leh frozen vawksa state pawn leh ram dang atanga lak luh a khap a.

Amaherawhchu kum 2022 a hunpui vuakveta State pawn atanga lakluh phalna sorkarin a tih chhuah chu vil zuina a awm loh avangin ASF hri veilo annih leh nih loh pawh enfiah loh vawksa frozen te hi zalen takin sumdawng ten an la lut mek ani anti.

Frozen vawksa Metric ton tam tak a rawn lut mek a, hei hian vawk vulh tute an thar chhuah hralh kawngah harsatna a thlen mek tih sawiin Vety Department in a

frozen vawksa lak luh atangin hlawkna an neilo nia an insawi chungin an hnuaiia PIGFED in frozen vawksa an zuar hian vawksa frozen leh vawk a pum a talh tur lak luh thlengin zalenna kawng zau tak a hawng mek tih an sawi a.

Hemi chungchangah hian sorkarin hma la se an tih thu an sawi a ni.

<><><>

ASF

Kumin chhungin Vawk pul hri African Swine fever avangin Mizoramah vawk 835 an thi tawh ni a report a ni a, ASF vanga vawk suat tawh zat chu 1086 a tling a ni.

Animal Husbandry & Veterinary Dept in a chhinchhiah danin darkar 24 kalta chhung khan African Swine Fever (ASF) vanga vawk thi zat chu 9 a ni a, vawk suat zat chu 51 a ni a. Heng vawk thi te hi Thingsulthliah khuaah 5, Chhingchhip leh Khumtungah 2 ve ve a ni.

ASF vanga vawk thi zat hi Kum 2021-22 khan vawk thi zat chu 33417 a ni a, kum 2022-23 khan 12795 a ni a, kum 2023-24 chhungin 1139 niin tihian a vaiin ASF vanga vawk thi zat chu 47351 a ni tawh a. Vawk suat tawh zat hi Kum 2021-22 khan 12568, kum 2022-23 khan 11686, kum 2023-24 chhungin 980 niin tihian a vaiin vawk suat zat chu 25234 a ni tawh a. Vawk thi avanga tanpuina dawng chhungkua 2488 an awm tawh a. AH& Vety Dept chuan ASF vanga vawk chante tanpuina tur cheng nuai 311.66 an dil mek bawk.

(CORR)

<><><>

5TH PHASE LS ELECTION

Tukin dar 7 atang khan Lok Sabha inthlan thawngana atan vote thlak a ni a. Hriat theih chinah tlai dar 5 thleng khan vote zaa 56 a tla tawh.

State paruk leh Union Territory pahniha Lok Sabha bial 49 ah vote thlak a ni a. Uttar Pradesh ah seat 14, Maharastra ah seat 13, West Bengal ah seat 7, Odisha leh Bihar ah seat 5 ve ve, Jharkhand ah seat 3 leh Jammu and Kashmir leh Ladakh ah seat 1 ve ve ah te inthlan buatsaih a ni a.

Candidate langsar zingah BJP leader leh Union Minister Rajnath Singh, Piyush Goyal, Smriti Irani, Congress leader Rahul Gandhi leh KL Sharma, National Conference leader Omar Abdullah leh LJP leader Chirag Paswan te an ni a.

Inthlana duty turin mi nuai 9 sing li leh sang 7 chuang tirhchhuah an ni a. Polling station sing 9 sang li leh 732 an awm a.

Lok Sabha inthlan rual hian Odisha Assembly bial 35 ah vote thlak a ni bawk.

IRAN PRESIDENT DIED

Iran President Ebrahim Raisi leh Foreign Minister Hossein Amir-Abdollahian te chu helicopter chesualah an thi. Iranian Red Crescent Society President sawidanin helicopter chesual hi vawiin khan hmuh a ni a, damchhuak an awm lo a ni. Chetsualna thlenna hmun hi Iran hmarthlang lamah a ni a. President leh Foreign Minister bakah hian sawrkar mi pawimawh dangte pawh an chuang a ni. President Raisi hi an ram thenawm Azerbaijan nen an irinaa tuikhuah hawna hun a hman zawhah a haw lam a ni a. Chhum zing nasa leh khaw chhia avanga chesual nia hriat a ni.

Iranian Cabinet chuan President leh Foreign Minister te an thi thu tihchian anih rualin inhmukkhawm hmanhmawh a ko nghal a. Hei hi darkar 24 chhunga an neih vawihnihna a ni a.

Iran sawrkar danah chuan Supreme Leader Ayatollah Ali Khamenei-a pawmpuinain Vice President Mohammad Mokhber chuan President ai a awl lailaw dawn a. Ni 50 chhungin President thar thlan a ni ang.

<><><>

TAIWAN

Taiwan-a sawrkar lai Democratic Progressive Party hruaitu Lai Ching-te President thar atan vawin khan rinawmna thutiam tira lakluh a ni. Taiwan Foreign ministry chuan President lakluh inkhawmah hian rampawn atangin mikhuah 500 chuang an tel tih sawiin an zignah hian Taiwan nena inlaichinna tha nei ram pariat hruaitu an tel bawh a ni.

Lai Ching-te hian President Tsai Ing-Wen a thlak dawn a. Taiwan hian kum 1949 atangin mahniin ro a inrel hnan tan a. Tunhnaiah China atangin vaukhanna a dawng nasa hle a ni.

<><><>